

碑記

疏引

文

序

關帝文獻會要卷之八

關帝文獻會要卷七

靈武師懿德秉如鑒定

雲間

孫 芑澧有編輯

盛增榮綺霞叅訂

碑記

京師正陽門關侯廟碑記

萬曆十九年

焦 竑

正陽門廟者祀漢前將軍關侯作也侯廟祀徧天下而稱正陽門者爲都城作也侯名在百世封號在累朝而稱漢前將軍者侯志也侯方崎嶇草澤中以一

旅之微卒能佐漢扶將傾之鼎摧強破敵威震天下可不謂雄哉及艱危之際矢死不回以畢其所志此與孔子所稱殺身成仁者豈有異也古忠臣烈士欲有立而中廢者其未竟之志鬱於生前未嘗不赫赫於後世矧侯之節皎然與日月爭光者哉余行天下顧瞻廟庭嘆蜀至今千三百年事之興廢磨滅者不可勝數獨侯之祠荒邊夷徼所在有之而芸夫牧豎婦人女子咸奔走恐後可謂盛矣都城自奠鼎以來人物輻輳綰四方之轂凡有謀者必禱焉曰吉而後

從事中間消沮姦謀振發忠義以助成聖化者非細
嗚呼爲君子而謀有同易筮拒不正之間無殊嚴卜
非盛德其疇能之國朝受命宅中百靈效職乃太微
營室之間侯實居之儼如環衛蓋四方以京師爲辰
極而京師以侯爲指南事神其可不恭余少知嚮往
夢寐之中累與侯遇屬茲士大夫謂籩豆有嚴而琬
琰未列懼無以歌頌遺烈垂之將來也乃命余碑而
銘之其辭曰

桓桓關侯天挺神武金節赤旂如羆如虎逸氣干

霄英風絕侶流連草昧歸心漢緒朋飛軼超爲帝
禦侮大夏顛隳極力撐拄靈鋒電耀威策霞舉勇
摧七將氣吞羣旅報曹詎盪詈吳非忤炳炳丹心
天高日午惟期一戰還都帝所兇袞掃除萬國安
堵方倚長城遽停相杵鬱鬱遺魂駭霆怒雨豈其
湮淪草木朽腐烝哉文皇鷹揚啟土奠鼎幽燕飛
龍九五鬱屈觚稜穹窿禁籞侯呵護之如棟斯礎
掩靄陰風弓刀楚楚森然環衛惟蹕是扈伏臘朝
昏有來士女盛之湘之阡蘭洲芥卜以筵茅如答

枹鼓子孝臣忠弟友兄序匪耳提之凜面相語義
舉長信姦謀遄沮侯其冥冥庇厥區宇矧國熙恬
邊陲中監翳日腥雲有紛獯虜侯甲皚皚亦赭其
馬乘風奮揚天兵鬼斧尙截狐豕披攘羯牯永祚
皇圖爲百神主牲牷旣醕松桂翔舞孔蓋低臨霓
裳紛下碑枕金龜鐘橫石虞敬勒銘詞流芳終古

金山衛募勒關公像記

萬曆十九年

侯繼高

歲萬曆己丑春二月六日繼高方會皖城海憲劉公
尙志祀海誓師出洋防汛是旦五鼓忽夢雲長公儼

然顯靈張弓東嚮而射若有所指示者繼高夙興拜
謝禱之曰仗公神威官兵倘有俘馘當飾廟貌勒石
以謝靈貺既而三月初連收花腦浪岡二捷夢之先
兆於是乎徵矣嗟乎公實啟佑我哉憶自童時方十
二齡公會授夢諄諄甚悉若將盡其生平而分明教
戒之繼高雖在冲年服膺勿替及承世資卽丁倭亂
領兵奔走履危蹈險艱苦萬狀每於臨敵仰天籲公
勇氣自倍其所經歷悉符前夢實賴神庥得不隕墜
以至於今是繼高蒙公之護持誠非淺矣奚敢忘焉

於公哉茲謹新廟宇奉安遺像遍求名筆而不可得
乃辛卯冬得馬遠之作敬礪之貞石并書此以誌公
之靈異云

貴州神武祠記

萬曆二十八年

郭子章

神武祠祀漢前將軍壯繆侯關雲長也將軍佐蜀漢
以戰功封侯功後世崇褒祀封武安王又稱王晉人
以王行不詭於聖賢又稱聖賢予讀史王之文不少
概見止辭曹操書日在天上心在人中日在天上普
照萬方心在人中不容一私王肝腸光潔皎如烈日

此其一節云予入晉櫟括其語題王祠曰日心天人而未以語家人一夕內子夢謁王祠頓首顧扁王曰此郭先生題也內子識之寤以語予嗚呼異也萬曆己亥予祇役于黔受命討夜郎離西昌夕夢王戒予周慎重默示賊平期予入黔逾年始會楚師入播不五月播平悉如王旨乃於署東建祠祀王題額神武祠命兒陵八分書之陵請曰神武之意與日心天人其旨異同予曰子學易乎易曰古之聰明睿智神武不殺而始之曰聖人洗心退藏於密神以知來智以

藏往夫惟洗心也而後神且智惟神且智也而後其
武神曹瞞猜忌殘忍夫人知之矣戮楊德祖誅孔文
舉不翅几上肉獲立德妻子不殺猶曰爲天下者不
顧家殺之無爲也遇王殊禮不殺冀爲我用賴以驅
馳也白馬之役王以報效辭去必不爲操用乃禮而
遣之庶幾長者之行豈非日心之天人卽猜忌殘忍
之夫亦足少動其良耶孔子曰天生德於予桓魋其
如予何天未喪斯文匡人其如予何桓匡殺機已萌
而猶恃生德之天與未喪斯文之天以自免王盟在

桃園堅若金石秉燭達旦義動鬼神此心之日炳炳

如丹曹瞞卽桓匡其如王何矣

田雯黔書署東園有神武祠祀漢前將軍壯繆侯關公一崇褒祀封武安王明萬曆庚子郭公青螺所建也墀半畝殿兩楹馬亭在其左鐵鼎一上有銘小篆漉漉莫可辨而刻櫟立石則三之一石言祠之由平播形於夢中英靈紀於射圃心日可埒尼父爵號不用曹表是也一石刻像龍從豫州雁行諸葛逸孟起之倫禰老瞞之魄是也下載全傳用蜀書本文而系之論斷揭達旦之亮節灑臨沮之涕淚悲天人恨呂陸也一石辨壯繆之訛名與實爽不宜橫加惡謚借音不借義以繆爲穆合乎布德執義之肯彰公道慰忠魂也且也裂石有歌金芝有頌青螺之所以祠神武者至矣予從而考之祠之建也平播以後事耳當夫青螺受命討夜郎離西昌之日夢王示賊平期逾年會楚蜀師不

五月悉如夢言豈非王之呵護黔疆而勉之以削平禍亂乎抑亦青螺平生爲人心與神通故寤寐相告語而有以對茲偉勲也夫世之祠王者多矣卽窮陬委巷婦人孺子皆知尊而事之然此日漢壽亭侯彼日壯繆非失之誣則失之褻耳青螺之用心於此獨有以辨其是非而正其聲稱者刪曹氏之爵封而存前將軍之號痛壯繆之非美名而指其壯穆之實德吾知王與青螺神明契合於數百載之上下而非惟平播之入夢已也噫區區一祠何足答靈爽而青螺工爲文章乃以文章追崇之夫文章者士君子讀書明大義將以爲千秋之定論也故三石巋然於廟貌之下反覆流連闡揚贊誦俾後之人有所觀感而興起焉此則青螺之志也歟而况乎撫黔垂十年多惠政正直仁恕屢立戰功又不止於文章乎易曰聰明睿智神武不殺取以名祠其大意可概見矣予才地不及青螺遠甚而事神惟謹願以私淑於郭公云

建武安王廟及鐘樓記

萬曆

方應選

單上人善唐舉術嘗識余食貧時以故里中稍稍色之里故有廟剏自一二巨姓基廣袤不盈畝巋然佛殿已耳殿後頽宇數椽盲道人棲焉余往讀書兩楹間盲道人朝經暮唄聲相屬也後十年許而上人往來禪誦其中則盲道人化爲烏有矣上人涉廟日久其爲唐舉日益驗於是里中卽真上人住持上人因稱說聚沙用廣四方檀越得布金若干乃於廟之坤隅建武安王廟而以其美冶銅爲鐘復構小樓左偏

貯之竣而問記余也夫武安之烈薄日月而摩三光
卽田峻女紅霍然耳目佛氏幽渺而武安感應灼灼
若斯也藉不信佛寧不信武安乎借武安之感應張
佛氏之因果於佛氏爲津梁已且一切衆生有慧者
百不一覲去貪去恡必賴聲聞以汝平等手執彼慈
悲幢悟無邊於有漏醒正覺於迷途倘所謂徧滿十
方空非耶上人粗耽內典能解夙生始以其相行而
卒也開示法門并破人我庶幾哉大宗權教也今去
余讀書時垂三十餘紀卽未遑頂禮惘恍夢遊烟雲

蒼莽智日長曜里中皈依弗絕上人之力哉

解州重修關祠記

萬曆三十七年

李維楨

季漢前將軍關壯繆侯解人也解故有祠距城西百步而遠南面中條而稍水北縈之更北則水爲涑爲汾山爲姑射爲紫金勝無所不攬結祠傳自陳隋不可考宋祥符元祐以追金元有益無因至明弘治間歲春秋祀著爲令嘉靖末以震更修萬曆初建麟經閣二十八楹高九丈翼以二樓廊七十四已東阿喬右丞增東西門鐘鼓樓嫌北勢漸下覆土爲山負若

殿長三百尺高稱之而祠規制大成儼然王居矣解
人少司徒趙公與其子太僕公生平嚴事侯嘗輯祠
志所以表章侯甚稱是後也公父子實先事而州大
夫張君與士民贊之旣成屬不佞爲之記世傳侯辭
曹操書曰日在天之上普照萬方心在人之內以表
丹誠其語實出管仲樞言有之道之在天者日在人
者心也孔子曰天無二日人無二王管仲九合諸侯
以尊周室君臣之義如日中天亟許其仁勝於匹夫
匹婦之諒而世或訾仲不死糾爲非春秋書伐齊納

糾以爲不受而強致之書齊小白入於齊明小白宜
有齊而管仲之心始白夫操劫遷獻帝闇干天位而
關侯扶昭烈而恢復之其奉昭烈王蜀必請命於漢
猶仲之佐桓公尊周也操挾天子以令諸侯而侯姑
爲之用名不爲君臣而義實爲讐賊非若仲之先仇
而後君也管仲幸而成侯不幸而敗乃其心仰不愧
天與日爭光矣仲之言曰有氣則生無氣則死生者
以其氣有名則治無名則亂治者以其名孔子去仲
二百年而曰微管仲吾其被髮左衽名不朽而氣若